

Carta al Presidente de la Federación d'Espeleoloxía del Principáu d'Asturies

*Isidro Baides Morente, Jesús Fernando Manteca Fraile
Francisco Solís González, José Luis del Río Fernández
Juan José Alonso Alonso
Miembros del Grupu d'Espeleoloxía Gorfolí – Asturias*

*Data: 17/09/01
espeleolex@espeleoastur.as*

A la atención del Sr. Presidente de la Federación d'Espeleoloxía del Principáu d'Asturies.

Sr Presidente:

Muncho bien conoz vusté'l nuesu esmolecimientu pola llaceriosa situación na que s'afaya'l nuesu deporte n'Asturies; situación yá irreversible y ensin igua dala al nuesu entender, de magar que dende esta Federación s'anecia nuna actitú que nós camentamos fundamente reacionaria y centraliega.

Foi vusté'l qu'escoyó tirar pel camín de la manipulación y la opacidá informatives y ye vusté'l que ta dexando n'herencia una espantible cadarma de lo que pudo ser una Federación deportiva fresca, imaxinativa, ambiciosa, abierta y modélica. Y eso ye dalgo que yá enxamás podrá ser, porque vusté fizo y ta faciendo una pergrave dexación de les propies competencies y posibilidaes de desendolcu de la nuesa actividá n'Asturies a mayor gloria d'una cierta idea de Federación estatal ríxida y verticalizada na que nun cabe l'aire fresco de les voces y opiniones estremaes a la de so. Siga vusté xugando a «*dexalo too atao y bien atao*» texendo los sos convenios y reglamentaciones ensin contar nin siquier colos propios deportistes que lu sofiten y durma tranquilu sabiendo de la santificación de too ello pol CSD... hai otra xente que fizo y fai como vusté, anque sábese bien qu'eso a la fin nun dexa más que povises.

Poru, en cuenta la situación y les circunstancies poles que traviesa'l nuesu deporte y en cuenta tamién de la indefinición organizativa d'esta Federación y el nuesu calter d'espeleólogos activos y miembros de l'Asamblea Xeneral d'esta Federación Asturiana d'Espeleoloxía del Principáu d'Asturies, los abaxo firmantes queremos encamentái que:

1.- Esvenceye dafechu a los abaxo firmantes de cualisquier aspeutu consultivu, organizativu o direutivu que tenga que ver cola xestión d'esta Federación d'Espeleoloxía del Principáu d'Asturies, quedando bien afitao que los abaxo firmantes -anque espeleólogos activos y miembros de l'Asamblea Xeneral d'esta Federación Asturiana d'Espeleoloxía del Principáu d'Asturies-, mos negamos a asumir cualisquier mena de responsabilidá deportiva, moral, personal o patrimonial que pudiera derivase de la citada situación.

2.- Esvenceye darréu a D. Jesús Fernando Manteca Fraile de la cadarma direutiva de l'Espeleosocorru nesta Federación, quedando bien afitao que l'abaxu firmante nun quier continuar figurando oficialmente como “*suplente del coordinador del Grupu de Espeleosocorro Asturiano*” y declina cualisquier mena de responsabilidá deportiva, moral, personal o patrimonial que pudiera derivase d'una situación d'emergencia en cavidades –mesmo que'l restu los abaxo firmantes-, daes les actuales circunstancies.

3.- Remita al nuesu Grupu razón detallao de la situación d'esta Federación nos caberos cinco años, emitiendo los correspondientes informes de calter económicu y de xestión, yá que los abaxo firmantes nun tenemos conocencia de la situación real de la mesma, nun habiendo aprobao nin dao consentimientu a informe de xestión nin balance económicu dalgún nos caberos cinco años, de lo que equí dexamos constancia espreso.

Sin más y aguardando que tanto dende esta Federación d'Espeleoloxía del Principáu d'Asturies como dende la Federación Española de Espeleología se mos siga garantizando la correuta xestión deportivo-alministrativa y los servicios d'enseñanza y seguranza nel desendolcu la nuesa activiá que les citaes organizaciones estatutariamente tán obligaes a prestar, y a los que nós tenemos drechu en cuantes que deportistes federaos, reciba vusté un candial saludu.